


三


傳言和

卷之五



A5

A4



A4

B4L

天后顯聖錄

嘗聞天下名山大川之勝每多精華發越之奇蓋
地靈所鍾非生聖人以興道致治而居君師之任
則生神人以理陽治陰而弘天地之化此理之常
有必然者吾莆之外島有湄洲屹大海中一孤嶼
也浩浩潏潏吞吐日月山崢嶸以浮青石嵯峨而
映紫而

諸譜載

天妃吾宗都巡愿公之女也誕降於有宋建隆元年

生而靈異少而穎慧長而神化潛山上白日飛昇
相傳謂大士轉身其救世利人扶危濟險之靈與
慈航寶筏度一切苦厄均屬慈悲至性得無大士
之遞變通現於人間乎自宋興以來威靈昭赫有
禱必應歷世彌遠聖德彌彰而神功廣大尤著於
江淮河海之中上為國家保衛轉輸下為生民拯
扶陷溺於是外國之艤上運之艇賈舸朝泛漁舟
晚渡凌海國而無波泊天涯而若路即有危瀑驚
飈顛連呼吸舟人望空號祝

神妃閔忽遙臨或香聞座次或火耀桅頭則萬疊狂

濤一葦飛渡帖若安瀾使東南澤國之以海為田
者得與中州沃壤之民並較桑麻同遊化日神之
功大矣著矣亘古今不可少矣故累代錫命寵頒
天朝遣官創建迄於今璇宮壯麗寶樹披離梳樓指
旭日以迎曦天閣干雲霄而直上噫異矣夫上古
有功德在國家者皆登祀典況

天妃秉坤儀司水德輔國庇民之功著於百世則謂
神之靈爽直與經天之日月行地之江河運乾坤而
不息可也余自京師歸偶於案頭得顯聖錄一編
捧而讀之不覺悚然而起曰

天妃之英靈昭著有如是乎余忝列秩宗三禮是司
異日肇舉祀典望秩山川奉七鬯以祝神庥佐我
國家億萬年無疆之治余將有厚望焉惜乎顯聖一
錄尚多闕畧姑盥手而爲之序以俟後之采輯而
梓傳

賜進士第榮祿大夫太子太保禮部尚書兼翰林院

學士裔孫林

堯俞

薰沐拜題

序

今天下公卿大夫以及士庶之家莫不肅壇壝潔
豆登夙夜齋祓以奉神祇蓋以神能福善禍淫禦
災捍患變化而不可測烜赫而不可掩者也然世
之好異者類多崇尚虛誕詭譎以爲神奇羣而奉
之至於聰明正直之神反多不敬故有靈有不靈
或應或不應遂有謂鬼神之說不足盡信者矣迨
余寓渚島披閱

天妃世譜考其所載如神授符篆現身救世諸事皆
歷歷不誣遂能感動

天朝自宋興以來累代褒崇封爵隆典洊錫至今廟
食春秋凡薄海內外罔不瞻禮其靈應洵顯且大
矣夫

天妃陰精毓秀水德儲靈所司者海也海之中噓喻
百川風濤萬狀倏而霾壘潛消天日晴霽倏而陰
風怒號濁浪沸騰彼貢獻之揚馭而渡者豈無傾
檣裂楫之危乎艤舫之鼓棹而出者豈無飛沫怒
濤之險乎賈人漁子之解纜而往者豈無屑沒於
龜鼉之穴流轉於蛟鱷之窟乎乃當顛連危急之
際拜禱

天妃恍若自天而降神光焜耀異香氤氲遂使溟渤
之飛滂變爲安瀾瀚海之狂飈化爲薰風則是江
淮河海中藉

神之庇護豈淺鮮哉雖然

天妃之英靈非獨著於江淮河海已也上而國家之
大事下而草野之細故凡竭誠致敬而禱者如影
之隨形響之隨聲靡不從其願而錫之福其或不
爲神所佑者必其元惡而自絕於天也必其大慙
而自殞其生也否則

神必體

上帝好生之心以保佑之矣故於降災降祥之中寓彰善癉惡之意歷七百餘載代彌遠而功彌著世愈久而德愈彰是功德不在一方而在天下不在一時而在萬世豈非能福善禍淫禦災捍患變化而不可測烜赫而不可掩者乎余一日登潛山揖僧而進之曰

天妃之異蹟彰彰如是曷不彙集成帙以傳於世僧曰唯唯昔太宗伯林公手授一編將博采見聞以補其未備願與同志者成之余於是先爲之序以爲勸世之一助云爾

賜進士第河南監察御史巡按江西等處裔孫

蘭

友識

序

湄洲天妃之神自宋迄今垂八百載歷著靈蹟舊

輯錄有書茲僧

照乘

刻而傳之夫書以傳信也而

神之信固不待書也古來所傳紀異之書多矣其描寫詭誕傑特令人讀之愕焉喜焉而且疑焉疑者何異之也神異蹟不一吾以爲無可疑夫天下變怪莫過於海今揚馭而來者上自朝紳下至賈鬻靡不瞻拜璇宮齋心祇奉以出入於蜃樓鼉穴之間卽或陰風怒號檣傾楫摧寄命頃刻雖上天濟物之意且幾乎窮而神靈所庇如見其形如聞

其聲百禱百應遂能轉駭浪爲安流凌汪溟若枕
席舉人世所詫異不經見之事皆可恃之以爲常
又何疑乎雖然福善禍淫天固不爽而善善惡惡
之靈神亦弗昧今使天下瞻拜之倫肅邀神貺而
違心悖義之輩復無指摘則人將扭扭則玩玩則
邪辟之萌又不可遏息則有時一二示警者政所
以堅善信之心耳故至誠感神理有必然響應之
靈實不可度不可射之妙諸如呼吸可通火風倏
忽者誠有取攜神機亘出驚愕意外非他紀異之
所爲怪誕者比也則是書之傳又何疑焉

前賜進士第通議大夫禮部左侍郎兼翰林院侍讀
學士黃起有薰沐題

序

閩人皆言吾林忠孝節義理學文章爲七建所自
始而獨不言神明感應之原則猶之未知吾林也
林自晉安郡王祿公入閩支衍派繁雖瓌偉奇特
之士代不乏人抗節西川挺髯作塚稱南夫子者
半天下而慈柔靈淑之氣間有特鍾則唯吾

天妃爲尤著云

天妃爲都檢 愿公六女學道莆之湄洲方其生也
地變而紫香遶於室及其昇化燕集於舟蜂翔於
水紫衣明燭救世現身由宋元迄今代著顯異之

續金泥玉簡先後褒封則誠林氏之美談也哉余
友三山胡獻卿靖嘗使琉球揚帆返棹忽一日颶
風大作折舵牙凡幾十數崇朝不息舟人震恐內
有官校得一奇楠大可滿尺高三尺餘可值千金
衆舉捐出刻

天妃聖像俄而奇鳥集於檣杪翠羽籠雲宛若翔鸞
舟賴以濟獻卿之所見若斯固不待遠考譜牒而
已知神靈之烜赫矣禦災捍患之烈彰彰載在祀
典而况

天妃之樹績東南能令海若效順萬里安瀾凡薄海

內外罔不瞻依有感必應之機捷如影響又豈五
嶽四瀆之所能及耶

賜進士第奉直大夫禮部精膳司員外郎

特簡吏科給事中族孫

嵎薰沐拜識

序

湄洲天妃吾有林氏唐邵州刺史公九世女孫也
林族俱出自唐明經擢第太子詹事上柱國披公
後則妃之高曾余諸祖也際五季擾攘之秋以曾
祖棄官歸隱厥後移居海之濱妃自是誕焉今世
祀祖祠尚在余過而瞻拜之遷界後梓里丘墟廟
宇圯壞因遣工置木石整造之矣粵聞神妃顯著
所傳軼事神奇未有不令人駭聽而疑其說之誕
耳近奉 冊命而渡滄溟南望煙波茫無津畔爾
時夏汛已過不便放舟乃於怡山院諭祭祝告甫

畢風颺忽而北轉頗覺默有神助遂決意解纜而行乘風破浪鼓棹中流雲水低連上下無際置身蒼茫之中竊以爲風濤阻絕屈指屆期殆未可以日月計且云水道極其艱虞余素不諳臨深履險縱一葦之所如而不見殊礁怪砂之慮瞬息千里纔二三晝夜徑到其處彼國臣人莫不以爲長江天塹飛渡而下斯蓋見佑於默默中而弗覺焉者乎逮夫典禮事竣方圖返棹而狂瀾涵湧澎湃稽天檣撼舟橫維楫爲之斷裂震盪澎湃四無足恃傾危間十難一全之勢舟中人咸謂惟神可禱以

無咎果爾一祝而傾者少安裂且不壞然而渺渺巨浸奔蹴却逃天日夜來帆影浮沉幾不知所稅駕不意昏黑飄泊之頃恍有二火晶光熠燿桅艦之前私幸有赫神靈於昭于天差可藉以無恙因而隨波翌駛輕舟已過萬重異哉其丕著如斯乎竒感殊應孰不稱神孰不疑誕苟非處身變現之景安知英光之昭灼如是其離離也又安信紀錄之傳載如是其歷歷弗誣也八百載靈慈於今爲烈利濟詎不大哉今者奉

俞旨榮馳特隆春秋肆祀盛典以答鴻庥夫豈過舉

是而為之序

賜進士出身戶部江南清吏司主事前內閣撰文中
書舍人加一級辛酉順天同考試官奉

命冊封琉球 賜蟒玉加正一品族孫 麟燭 鹽沐

拜識

序

神之功用大矣哉在天為日月風雷在地為華嶽
河海以及秉聰明正直之姿存忠孝節義之性明
而為人幽而為神者皆能參立微之理達變化之
機操福善禍淫之權載在祀典百世不刊神之功
用大矣哉然江海之中濟人利物禦災捍患有
功於國下有德於民則

天妃之英靈為最著

天妃生於湄嶼道成飛昇屢顯神異或曰龍女或曰
大士化身此皆不可知意者乾坤同運陰陽並施

上天篤生

聖妃殆以坤道成乾道以陰德佐陽德乎夫天地間惟海最大萬水之所會也百物之所聚也蛟龍龜鱉之所出沒也而

天妃實主之向者東南水道等於朝市王臣之出使運漕之轉輸小而釣艇賈艫大而樓船貢舶皆飄泊於波濤震撼之時浮沈於風雨晦冥之際茫茫巨浸傾檣毀楫葬於江魚之腹中者往往而然天下之艱危孰有過於海乎乃自

天妃降世海若爲之效靈河伯爲之助順異香一聞

則怒濤不能災寶光一現則狂飈不能害且不特此也水旱不時禱之則風雨和調荏苒符籙發禱之則井里敕寧癘疫爲殃禱之則俗躋仁壽邪魔爲祟禱之則人迪吉康國有師旅助戰而王師奏凱郡有凶荒拯飢而民困咸甦

天妃之有功於國有德於民如此可以使四海有安瀾之慶可以使萬世有清晏之休可以輔帝王之所不及可以補天地之所不足

天妃之功用不更大哉故自有宋建隆以來歷今七百餘載游膺

天后聖訓
朝廷錫命廟祀徧於海內繼自今降福孔皆降福孔
夷億萬年拜

神之庥尚未有艾也人龍生長海濱嘗從里中父老

瞻禮於廟廊之下自播遷後寄寓郡城遙望故園
宮闕在煙雲縹緲中爲之嗟嘆者久矣適有僧照

乘從湄嶼來踵門而請曰

天妃顯聖錄秘而未傳願求編輯以垂不朽余謝之
曰

天妃威靈昭著赫赫在人耳目奚以錄爲且

聖德廣大難名余不敏固陋寡聞安能闡揚而播傳

之乎僧曰神以孚佑而顯事以紀載而傳是錄也
雖聞見未備而

天妃輔國佑民之功彰彰可睹茲欲重加增訂付之
剞劂俾天下後世咸思竭誠致敬以介景福是大
有造於人世也不可以不傳予奚辭焉爰焚香淨
几而爲之編輯其大畧云

朝陽丘人龍盥沐百拜謹識

序

余暨觀古今所談陰陽之故與夫神人應感之機
蓋不勝見聞矣但其間不無或然或不然之跡又
未有不付之不可知之天異哉湄嶼之神妃其昭
格之奇乃無時無處而弗著其靈洵至誠之不可
掩也如此夫生爲正人歿爲明神理固有然彼人
間鄉閭所廟宇崇祀之者莫非英氣不磨發越人
世然亦揆灼一時血食妥厥靈已爾至若世遠代
湮而精英彌烈者則
天妃爲獨異

天妃非空桑幻化之身吾林氏之女孫子也爲先祖避亂遂移居東海之濱譜系載之詳矣然此地勢極南溟實萃萬派會歸之氣一六函靈而

天妃誕降於其間

妃生而穎慧少多希奇甫垂髻入湄嶼焚修遂能知咎知休常爲人恤灾度厄越十載道成而飛昇鄉之人神之異之而壇壝祀之其宮宇俯瞰滄溟當舸艦去來之津赫聲濯靈無禱弗應由水道者必從而問福相傳家香而戶火焉稱爲大士轉身亶其然乎以故上而王臣冊使飛輓輸漕下而釣艇

賈艘外及番航貢舶靡不望湄洲而起愛敬利濟効靈咸蒙依庇然或者專以其爲海之神而崇奉之者非也溯自宋迄今由靈女封夫人進封靈惠妃又洊封普濟天妃累代綸音曾膺二十四命之寵勲在國家澤在生民明禋遍天下何嘗爲海而報德酬功第以神無時不隱現於人間每陟降乎蛟宮鼉穴抑孰知其慈仁之有所獨摯焉者我東南粒食乎舟楫蘆葦於浮達水患最苦風波性命號叩望空其至誠懇惻故神之垂恤特至感動最速雖然一片慈濟肺腸善善固多呵護之厘而其

於惡惡之中亦未或曲庇蓋以叔世惡多而善少
則拯顛連於籲天無聞之時警悖慢以指摘必及
之處將使人信福善禍淫之確有明徵庶稍戢邪
心於萬一斯固佛菩薩無已之誓願也風雲水火
呼吸可通淮海江河安危攸賴幾千百年而神之
英光殆弗替乎誰謂

天妃之篤生不卽落伽之通變通現於人間世也哉

族孫 有勝 敬盥沐拜識



湄洲景圖





湄洲景圖







天后顯應錄

褒封

宋朝

宣和四年給事中允迪路公使高麗感神功奏上
賜

順濟廟額 蠲祭田稅立廟祀於江口

紹興二十六年以郊典特封

靈惠夫人

紹興三十年以神霧迷海寇加封

靈惠昭應夫人

褒封

乾道二年興化疫以神降白湖得甘泉飲者立愈
郡使奏聞詔封

靈惠昭應崇福夫人

淳熙十一年以溫台勦寇神助有功加封

靈惠昭應崇福善利夫人

紹熙元年以神救旱功褒封進爵

靈惠妃

慶元四年以神妃救潦功加封

靈惠助順妃

慶元六年以神妃護國庇民功叅立造人本乎親

慶自先貽詔封

妃父諱愿字惟慤

積慶侯 改封

威靈侯 又以顯赫有俾民社加封

靈感嘉祐侯

妃母王氏

顯慶夫人

妃兄諱弘毅

靈應仙官

妃姊

慈惠夫人

開禧改元以神退敵奇功加封

靈惠助順顯衛妃

嘉定改元以神救旱並助擒賊加封

靈惠護國助順嘉應英烈妃

寶祐改元以神濟興泉飢加封

靈惠護國助順協正嘉應英烈妃

寶祐三年以顯靈加封

靈惠護國助順協正嘉應慈濟妃

寶祐四年以錢塘堤成神助有功加封

靈惠護國助順協正嘉應善慶妃

開慶改元以神助火焚强寇有功進封

靈惠護國助順協正嘉應顯濟妃

元朝

至元十八年以庇護漕運進封

護國明著天妃

至元二十六年以海運藉佑加封

護國顯佑明著天妃

大德三年以庇護漕運加封

護國輔聖庇民顯佑明著天妃

延祐元年以漕運遭風顯靈救助加封

護國輔聖庇民顯佑廣濟明著天妃

天曆二年以怒濤拯溺加封

護國輔聖庇民顯佑廣濟靈感助順福惠徽烈明著

天妃

至順元年以救漕艘賜

靈慈廟額

明朝

洪武五年以神功顯靈勅封

昭孝純正孚濟感應聖妃

永樂七年以神屢有護助大功加封

護國庇民妙靈昭應弘仁普濟天妃 建廟都城外

額曰

弘仁普濟天妃之宮

本朝

康熙十九年征勦廈門神助取捷勅封

護國庇民妙靈昭應弘仁普濟天妃

康熙二十三年特封

天后

天后顯應錄

諭祭

宋朝

理宗開慶改元神火焚賊助俘興泉郡史徐 奏上
勅議典禮進封致祭兩司捐萬貲修建宮殿

元朝

文宗天曆元年神拯怒濤漕艘欽差翰林國史院學
士晉顏實理賁御香馳驛致祭

天曆二年遣官致祭天下各廟 計同時有文者

直沽廟

淮安廟

平江廟

崑山廟

露漕廟

杭州廟

越廟

慶元廟

台州廟

永嘉廟

延平廟

閩宮

莆田白湖廟

湄州廟

泉州廟

明朝

太祖洪武五年遣官馳祭

成祖永樂元年欽差太監鄭和往西洋水途適遇狂

颶禱神求庇遂得安全歸奏上奉

旨差官詣湄嶼致祭賞其族孫寶鈔各五百貫

本年又差內官張悅賀慶送渤泥國王回舟中危
急禱神無恙歸奏奉

旨差官致祭

本年又差內官尹璋往榜葛刺國公幹水道多虞
祀禱屢有顯應回朝具奏特遣太監鄭和太常寺
卿朱焯馳傳詣湄山致祭

永樂三年以神轉風滅寇奉旨着福建守鎮官整蓋
廟宇致祭

永樂七年以神助滅寇反敗為功奉旨褒嘉委官置廟中器皿指揮陳慶等親賫詣廟致祭

永樂十二年欽差內官甘泉送榜葛刺國王海中危急禱祝獲安詣廟致祭

永樂十三年欽差內官侯顯往榜葛刺國往來危懼祈禱屢叩顯應奉

旨詣廟致祭

本年十一月又委內官張源到廟御祭一壇

永樂十五年欽差內官王貴通莫信周福率領千戶彭祐百戶韓翊並道士詣廟修設開洋清醮致祭

永樂十六年又差內官張謙到廟御祭着本府官員陪祭

永樂十八年正月以神助斬倭寇奉旨遣御史劉麟內官孔用唐貞詣廟致祭送長生鹿二對

永樂十九年欽差張源往榜葛刺國於鎮東海洋遭風神功護救歸國製袍幡詣廟致祭

本年又太監王貴通遇厄禱祝顯救奏上遣內官詣湄修整祖廟備禮致祭

仁宗洪熙元年四月欽差內官柴山往琉球載神香火以行外洋人墜舟飄顯靈示救無恙回京奏上

奉

旨遣官致祭

宣宗宣德五年以出使諸番得庇遣太監楊洪並京官及本府縣詣湄嶼致祭

宣德六年欽差正使太監鄭和領興平三衛指揮千百戶並府縣官員詣湄嶼致祭并修整廟宇

世宗嘉靖中託夢御史林潤劾奏嚴嵩奸惡得

旨除奸特建廟宇涵江東卓地面

本朝

聖祖康熙二十三年八月廿四日欽差禮部郎中

雅

虎等賁

御書香帛到湄詣廟致

祭

康熙五十九年七月十一日冊封琉球使臣

海寶

徐葆光復

命啟奏神功疏請春秋祀典禮部覆奏令該地方官

春秋致祭編入祀典八月初三日題初六日奉

旨依議欽遵在案

雍正二年 月奉

旨欽差代

諭祭

升后顯聖錄

天致祭賁捧

敕命祭文香帛詣湄致

祭

歷代褒封致祭詔誥

宋朝

光宗紹熙元年加封靈惠妃詔

奉

天承運

皇帝詔曰古今崇祀岳瀆懷柔百神禮所不廢至於
有功國家有裨民社者報當異數靈惠崇福善
利夫人林氏靈明丕著惠澤亶敷累有禦災捍
患之勛今見救旱恤民之德叅贊既弘爵寵應
尊茲特進封爲靈惠妃秩視海嶽之崇典敘春

秋之重尚其服茲徽命以懋鴻庥於勿替欽哉



元朝

世祖至元十八年封護國明著天妃詔
奉

天承運

皇帝制曰惟昔有國祀爲大事自有虞望秩而下海
嶽之祀日致崇極朕恭承天休奄有四海粵若
稽古咸秩無文惟爾有神保護海道舟師漕運
恃神爲命威靈赫濯應驗昭彰自混一以來未
遑封爵有司奏請禮亦宜之今遣正奉大夫宣
慰使左副都元帥兼福建道市舶提舉蒲師文

冊爾爲護國明著天妃於戲捍患禦災功載祀
典輔相之功甚大追崇之禮宜優爾其服茲新
命以孚佑我黎民陰相我國家則神之享祀有
榮永世無極矣

世祖至元二十六年加封顯佑詔

奉

天承運

皇帝制曰惠澤調雨暘之序鎮四海而保無虞祥光
映風浪之區護歲漕而克有濟忠貞衛國慈惠
寧民先朝已著於綸褒今日宜申其寵命益旌
徽號允協僉言元祀報功獨超天極之貴水行
受職永贊皇運之昌祗服徽恩懋弘寵貺可加
封護國顯佑明著天妃

成宗大德三年加封輔聖庇民詔

奉

天承運

皇帝制曰利涉洪波顯造化難名之德尊崇懿號傳
神明不朽之榮申錫寵章亶爲殊典可加封護
國輔聖庇民顯佑明著天妃

仁宗延祐元年加封廣濟詔

奉

天承運

皇帝制曰愛人利物仁克著於重溟崇德報功禮宜
崇乎異數肆頒綸命用舉隆儀護國明著天妃
林氏聰明通達道心善利當臨危履險之際有
轉禍爲福之方祥飈迭馭曾聞瞬息危檣出火
屢見神光有感卽通無遠弗屆顧東南之漕運
實左右之憑依不有褒恩曷彰聖跡於戲爵以
馭貴宜宣懿號之加海不揚波尚冀太平之助

可加封護國輔聖庇民顯佑廣濟明著天妃

文宗天曆二年加封徽烈詔

奉

天承運

皇帝制曰陰陽不測惟神克盡變理之道河山永定
在國尤資轉運之功故祀典所載莫重於懷柔
聖蹟所彰當加於崇奉茲覽外廷之奏允惟漕
運之艱不有護持曷臻浮達護國明著天妃天
地鍾靈山川炳慧風轉舵摧屢救吾民之厄火
流水淨常全漕舶之危至於曠浸之失時莫不
禱祠而請命其禦大災捍大患焉若此則德懋

官功懋賞也宜之爰極徽稱亶爲異數於戲褒
封二十字鴻號聿隆允有無窮之譽廟食億萬
年龍光孔煥尚其永孚於休弘闡靈慈益章寵
貺可封護國輔聖庇民顯祐廣濟靈感助順福
惠徽烈明著天妃

明朝

太祖洪武五年壬子正月勅封昭孝純正孚濟感應
聖妃遣官馳祭御製文一道

奉

天承運

皇帝制曰國家崇報神功郊社旅望而外非有護國
庇民豐功峻德者弗登春秋之典明著天妃林
氏毓秀陰精鍾英水德在歷紀旣聞禦災捍患
之靈於今時尚懋出險持危之績有裨朝野應
亨明禋朕臨御以來未及褒獎茲特遣官馳詔

封爲昭孝純正孚濟感應聖妃其服斯徽命宏
佐休光俾清宴式觀作覩之隆康阜永著赫濯
之賜欽哉

成祖永樂七年以神功浩大重禪國家遣太監鄭和
太常寺卿朱焯馳傳詣湄山致祭加封護國庇
民妙靈昭應弘仁普濟天妃

奉

天承運

皇帝制曰惟昭孝純正聖妃林氏粹和靈惠毓秀坤
元德配蒼穹功叅玄造江海之大惟神所司佑
國庇民夙彰顯應自朕臨御以來屢遣使諸番
及餽運糧餉經涉水道賴神之靈保衛匡扶飛
鸞翼送神光導迎歛忽感通捷於影響所以往

來之際悉得安康神之功德著在天壤必有褒
崇以答靈貺茲特加封護國庇民妙靈昭應弘
仁普濟天妃仍建廟於都城外賜額曰弘仁普
濟天妃之宮爰遣人以牲醴庶羞致祭惟神其
鑒之

宣宗宣德五年欽差太監楊洪等出使諸外國神功
加佑風波無虞特遣官祭告
奉

天承運

皇帝制曰惟妙靈昭應天妃林氏嵩嶽孕靈巽坤合
體噓風吸雨統江淮河海之宗佑國庇民濟天
地東南之險適承水德乃亮玄工海不揚波維
爾嘉績朕式欽焉茲特虔備牲醴遣官祭告神
其鑒臨尚饗

宣德六年欽差正使太監鄭和領興平三衛指揮千
百戶並府縣官員買辦木石修整廟宇并御祭
一壇

奉

天承運

皇帝制曰茲遣鄭和等道涉江海往返諸番惟神有
靈默加佑助俾風波無虞人船利涉浮達之際
咸賴底綏特以牲醴祭告神其饗諸

本朝

聖祖康熙十九年神助萬將軍克敵廈門奏上欽差
禮部員外郎辛保等賚香帛詔誥加封致祭
奉

天承運

皇帝制曰國家懷柔百神式隆祀典海嶽之祭罔有
弗虔若乃明祗效靈示天心之助順滄波協應
表地紀之安流聿弘震疊之威克贊聲靈之濯
豈繫人力實惟神庥不有褒稱曷彰偉伐維神
鍾竒海徼綏奠閩疆有宋以來累昭靈異頃者

天啓聖鑑
島氛不靖天討用張粵自禡牙以逮奏凱歷波
濤之重險如枕席以過師潮汐無虞師徒競奮
風颺忽轉士氣倍增殲鯨鯢於崇朝成貔貅之
三捷神威有赫顯號宜加特封爾爲護國庇民
妙靈昭應弘仁普濟天妃載諸祀典神其佑我
兆民永著安瀾之績眷茲景命益昭重潤之休
敬遣禮官往修祀事維神鑒之

御祭文

元朝

文宗天曆二年遣官致祭天下各廟八月己丑朔日
祭直沽廟

御祭文曰國家以漕運爲重事海漕以神力爲司命
今歲兩運咸藉匡扶江海無風濤之虞朝野有
盈寧之慶帝用欽嘉謹遣使者奉香仰答靈貺
惟億萬年神永保之

○八月十六甲辰日祭淮安廟

御祭文曰轉運資於溟海積貯重乎京師乘風駕浪

神明是司裕國足民朝廷攸賴臣叩命詣淮之廟恭致御香以報以祈惟神鑒格尚申佑之

○八月二十五癸丑日祭平江廟

御祭文曰至廣者海也海之大百川會焉至正者神也神之命百靈聽焉惟國之本資於食而歲之運浮於海既歷溟渤之中常有風波之險今茲運艘接舳偕來微神陰相將奚致焉謹潔牲醴備樂舞以答明賜惟神居歆永保無斁

○八月二十七乙卯日祭崑山廟

御祭文曰姑蘓之濱太倉之口運道所繇出也浮江

涉海衝風而擊浪也怒濤狂瀾鯨吸而鰲擲也萬里澎湃險不可測也巍巍聖妃臨下有赫也望洋不驚風波以息也春夏所輸咸達於京實靈貺也奉命禋祀報明德也神之保之長無極也

○八月二十九丁巳日祭露漕廟

御祭文曰三江控東南之會春艗夏舶雲集轉輸聖神臨之濟險拯危實國家之所式憑而官民之所仰賴也今歲漕運風濶恬然護國之功著於百世謹奉香展牲庸申昭謝尚冀靈爽垂休無

極

○九月初六甲子日祭杭州廟

御祭文曰杭爲大藩財賦所聚國計之重倚於東南
今茲兩運咸利攸往長江息浪萬檣雲集大海
安瀾求資粒食神之相之厥勲炳焉景貺旣渥
福祿是綏巍巍廟庭牲薦孔碩用崇明典與國
咸休

○九月初九丁卯日祭越廟

御祭文曰於越之域外負大海三江東注運道所經
惟神眷佑赫赫顯應弘開慈惠濟我糧漕萬里

一息靜無風濤微烈茂昭天地同功何以報賜
恭獻瓊漿自今伊始歲其清宴萬世無疆

○九月十四壬申日祭慶元廟

御祭文曰浙水東郡襟江帶海漕道遠涉萬里波濤
神妃降鑒丕著弘功息偃狂飈迅掃妖氛轉運
咸利國儲充盈永頌明德百世揚休

○十月己丑朔日祭台州廟

御祭文曰洪惟天妃自天降臨功侔化育德配玄穹
瀚海安瀾風帆順飛弗驚弗震是憑是依惟茲
運道實賴扶持恭承帝命報答靈威佑我邦家

永膺多福

○十月初六甲午日祭永嘉廟

御祭文曰國家積貯海運爲重春秋轉輸風波不測
乃凌大海而安瀾涉長江而飛渡神所以衛之
者厥功宏矣特遣臣奉香詣祀惟靈惟聖其永
敷慈惠以勵相我國家

○十月十三辛丑日祭延平廟

御祭文曰劍之水兮潺湲渺長溪兮汪洋峙靈宮兮
在上鎮海嶽兮瑤壇繽紛兮羽旄綢繆兮天香
海不揚波兮安流飄祥飈兮引舟徼大惠兮罔

極濟我漕兮無憂望白雲兮天際乘彩鸞兮悠
悠獻瓊觴兮式歌且舞作神主兮永鎮千秋

○十月十七乙巳日祭閩宮

御祭文曰朝廷歲遣使奉香靈慈之廟以答明賜今
春逮夏漕舟安流悉達京師其護國之功庇民
之德莫盛於此是用瞻禮閩宮蠲吉薦羞惟神
昭格佑我皇運以宏天休

○十月十九丁未日祭莆田白湖廟

御祭文曰天開皇元以海爲漕降神於莆實司運道
顯相王家弘濟兆民盛烈休光終古不滅特遣

臣虔修祀事承茲休命永錫嘉祉於萬斯年百
祿是宜

○十月二十戊申日祭湄洲廟

御祭文曰惟乾坤英淑之氣鬱積扶輿以篤生大聖
炳靈於湄洲爲天地廣覆載之恩爲國家弘治
平之化特命臣恭詣溟島虔修歲祀秩視海嶽
光揚今古於戲休哉

○十月二十五癸丑日祭泉州廟

御祭文曰聖德秉坤極閩南始發祥飛昇騰玉輦變
現藹天香海外風濤靜寰中麟鳳翔民生資保

錫帝室藉勛勩萬載歌清宴昭格殊未央

本朝

聖祖康熙二十三年八月二十四日欽差禮部郎中
雅虎等賫香帛到湄詣廟致祭

御祭文曰國家茂膺景命懷柔百神祀典具陳罔不
祇肅若乃天休滋至地紀爲之効靈國威用張
海若於焉助順屬三軍之奏凱當重譯之安瀾
神所憑依禮宜昭報惟神鍾靈海表綏奠閩疆
昔藉明威克襄偉績業隆顯號裡享有加比者
慮窮島之未平命大師之致討時方憂旱井澤
爲枯神實降祥泉源驟湧因之軍聲雷動直搗

荒陬艦陣風行竟趨巨險靈旗下颺助成破竹
之功陰甲排空遂壯橫戈之勢至於中山殊域
冊使遙臨伏波不興片帆飛渡凡茲冥佑豈曰
人謀是用遣官敬修祀事溪毛可薦黍稷惟馨
神其佑我家邦永著朝崇之戴眷茲億兆益弘
利賴之功惟神有靈尚克鑒之

維康熙五十八年歲次己亥五月癸酉朔越祭

日癸巳

皇帝遣冊封琉球國正使翰林院檢討海寶副使翰

林院編修徐葆光致祭于

天后曰惟神顯異風濤效靈瀛海扶危脫險每著神
功捍患禦災允符祀典茲因冊封殊域取道重
溟爰命使臣潔將裡祀尚其默佑津途安流利
涉克將成命惟神之休謹告

維康熙五十九年歲次庚子二月戊戌朔越祭
日丁卯

皇帝遣冊封琉球國正使翰林院檢討海寶副使翰

林院編修徐葆光致祭于

天后曰惟神誕昭靈貺陰翊昌圖引使節以遄征越
洪波而利濟殊邦往復成事無愆克暢國威實
惟神佑聿申昭報重薦苾芬神其鑒歆永有光
烈謹告

奏疏

冊封琉球正副使

汪林麟 輯等題爲

聖德與神庥等事

臣等一介小儒遭逢

聖主特允會推遣使海外臨軒

天語如典如潢

臣

等凜遵

訓誨恭捧

御覽

詔敕及

諭祭文三道星馳赴閩於二十二

年六月二十日

諭祭海神天妃於怡山院是

時東風正猛羣言夏汛已過未易開洋乃行禮

甫畢風聲忽轉舵樓旌旗盡皆北向

臣等知屬

天妃示異決計放舟二十三日辰刻遂出五虎

門過東沙山一望茫茫更無山影日則雙魚引
道夜則萬鳥迴翔助順效靈不可殫述以海道
考之二十四日當過小琉球花瓶嶼雞籠淡水
諸山而是日辰刻已過彭佳山酉刻已過釣魚
嶼不知諸山何時飛越二十五日夜見姑米山又
不知何以遂踰赤嶼二十六日夜見姑米山又
不知何以遂至馬齒山此時琉球接封之陪臣
唯恐突如入境國中無所措手再拜懇求暫泊
灣中容其馳報乃落篷而篷不得下拋旋而旋
不可留瞬息已入琉球之那霸港直達迎恩亭

前矣時方辰刻距開洋三晝夜耳臣等未經蹈
險視等尋常而彼國臣民莫不相看咋舌羣言
自古迄今未有神速如此者共稱聖人在上海
不揚波則聖人在上海可飛渡遠人駭嘆如此
臣不敢不據實奏聞至於貧瘠小邦常苦風旱
乃者典禮既竣甘雨如傾颶風不作羣欣足食
凡此 天澤之應何非

聖德之感洵足流光史冊焜耀千秋者也臣等潔已

勵衆幸免愆尤冬汛歸舟還思利涉而其時

御筆 詔敕盡留海邦百神呵護不可復冀風濤震

撼浪與天高掀簸無已人皆顛覆臣等當百死
一生之際惟有忠誠自信必無他虞煙竈盡委
逝波無由得窺彼岸於是肅將

簡命共籲天妃謂神既受封

聖朝自應佑臣返節如其獲濟當爲神乞春秋祀典
永戴

皇恩虔禱方終神應如響於時束桅之鐵箍已斷十
三而桅不散繫篷之頂繩一斷不可復續而篷
不墮桅前之金拴裂踰尺而船不壞有此三異
可歎神功伏乞

敕下禮臣議舉春秋二祭著地方官敬肅奉行則
海疆盡沐神庥履坦無非

聖澤矣伏乞

睿鑒施行奉

旨該部議奏

靖海將軍侯福建提督施朗為神靈顯助破逆
請乞

皇恩崇加 敕封事竊照救民伐暴仗天威之震揚
輔德效靈見神明之呵護閩之湄洲島有歷代
敕封天妃往來舟楫每遇風濤險阻呼之獲安
前提督萬曾經題請 敕封臣奉命征勦臺灣
康熙二十一年十一月師次平海灣離湄洲
水道二十里許有天妃廟緣遷界圯毀僅遺數
椽可蔽神像臣因稍為整掃以妥神廟左有一
井距海數武深止丈餘蕪穢不治臣駐師其間

時適天旱七月餘該地方人民咸稱往常雨順井水已不能供百口今際此愆陽又何能資大
師所需臣遣人淘浚泉忽大湧自二十一年十一月至次年之三月晝夜用汲不竭供四萬衆
裕如也此皆

皇上峻德格天使神功利我行師也臣乃立石井傍
額之曰師泉以誌萬古不朽且率各鎮營弁捐
俸重建廟宇及康熙二十二年六月十六二十
二等日臣在澎湖破敵將士咸謂恍見天妃如
在其上如在其左右而平海之人俱見天妃神

像是日衣袍透濕與其左右二神將兩手起泡
觀者如市知爲天妃助戰致然也又先於六月
十八夜臣標署左營千總劉春夢天妃告之曰
二十一日必得澎湖七月可得臺灣果於二十
二日澎湖克捷七月初旬內臺灣遂傾島投誠
其應如響且澎湖八罩虎井大海之中井泉甚
少供水有限自臣統師到彼每於潮退就海次
坡中扒開尺許俱有淡水可餐從未嘗有及臣
進師臺灣彼地之淡水遂無矣均由我

皇上至仁上達昊蒼故無往而不得神庥俾臣克底

成功非特賜顯號無以揚幽贊之美彰有赫之靈臣擬於班師敘功之日一起題請加封近接邸報冊封琉球正使汪楫以聖德與神庥等事具題請封因先以其靈異詳陳伏乞

皇上睿鑒 敕封并議加封奉

旨該部議奏

部題遣官獻香帛讀文致祭祭文由翰林院撰擬香帛由太常寺備辦臣部派出司官一員前往致祭康熙二十三年八月二十四日奉

旨依議

差回琉球國翰林院檢討臣海寶編修臣徐葆

光等謹

奏為奏

聞事臣等於康熙五十七年六月初一日奉

旨冊封琉球國王十四日於熱河面請

聖訓出都至閩於五十八年五月二十日登舟次日

至怡山院

諭祭天妃二十二日從五虎門放洋西南順風行八日六月初一日登岸二十七日行

諭祭禮七月二十六日行

冊封禮諸宴禮以次舉行十二月二十六日登舟候
汛本年二月十六日乘東北順風行半月三十
日始抵福州五虎門臣等往返海道畧無危險
皆

皇上德邁千古

福與天齊臣等奉

命經行絕遠之處神靈效順臣等闔船官兵以及從
役數百人無一虧損皆得安歸臣等不勝欣幸
即琉球國屬併福省官民人等俱稱竒致頌以
為皆我

皇上德遍海隅之所致也其中往返之時風少不順
臣等祈禱天妃即獲安吉自前平定臺灣之時
天妃顯靈效順已蒙

皇上加封致祭今默佑封舟種種靈異如此仰祈
特恩許着該地方官春秋致祭以報神庥伏候
聖裁謹奏
聞

禮部謹題為奏

聞事該

臣

等議得差回琉球國翰林院檢討

臣

海寶

編修

臣

徐葆光等奏稱

臣

等奉

旨冊封琉球國王往返海道闔船官兵以及從役數百人無一虧損皆得安歸其中往返之時風少不順

臣

等祈禱天妃即獲安吉自前平定臺灣之時天妃顯靈效順已蒙

皇上加封致祭今默佑封舟種種靈異仰祈特恩許着地方官春秋致祭以報神庥等語欽惟皇上德周寰宇化洽海隅

天尺星金
詔命所經神靈協應茲以
冊封琉球國王

特遣使臣舉行典禮往返大海絕險之區官兵從役
數百人皆獲安吉固由天妃顯靈實皆我

皇上懷柔百神海若效順所致也查康熙十九年

臣

部議得將天妃封爲護國庇民妙靈昭應弘仁
普濟天妃遣官致祭等因具題奉

旨依議欽遵在案今天妃默佑封舟種種靈異應令
該地方官春秋致祭編入祀典候

命下之日行令該督撫遵行可也

臣等未敢擅便

謹題請

旨等因康熙五十九年八月初三日題本月初六日
奉

旨依議

臣葆光按元史志云至元中以護海運有奇應

加封天妃神號積至十字廟曰靈慈直沽平江
周涇泉福興化等處皆有廟皇慶以來歲遣使
賫香遍祭金幡一合銀一錠付平江官漕司及
本府官用柔毛酒醴便服行事祝文云維年月
日皇帝特遣某官等致祭於護國庇民廣濟福

惠明著天妃則歲時之祭自元已有之矣前明
嘉靖中冊使陳侃使還乞賜祭以答神貺禮部
議令布政司設祭一壇報可此又特祭一舉行
者也萬曆三年冊使蕭崇業始請秩祀海神合
舉祈報二祭至今封舟出海因之康熙二十二
年冊使臣汪楫還具疏請照嶽瀆諸神着地方
官行春秋二祭禮部議未准行今臣等在海中
祈神佑庇竊計封號尊崇已極惟祀典有缺故
專舉爲詞神應昭格今果蒙
恩特賜允行典禮烜赫以答神庥超越千古矣

祈禱文

總督祈禱疏文

福建總督姚

啓聖

謹抒愚衷上請天妃主裁而言

曰曰海廣濶惟神是憑風濤順逆亦惟神是主是
神之權大德尊適足侔天地而並日月也今者荷
神有靈助除六十年猖狂之大寇竟停五六月颶
颶之大風除生靈之大害立朝廷之殊功啓聖得
以安享太平皆尊神之默佑也今啓聖親總舟師
遴福寧州總兵黃大來叅政道劉仔捧頒
恩赦前至臺灣因尚少西北正風是以越廟求神冀

借一帆早到臺地

啓聖

百叩稽首之下見廟貌尚

有未妥寸心甚爲不安况正殿朝南而朝天樓山

門各俱西向亦非宜於神靈之所憑依也今

啓聖

議以正殿既朝南則朝天樓鐘鼓樓山門俱宜開

闢朝南此爲一議如神意定於朝西則山門鐘鼓

樓止須蓋完惟將朝天樓陞高改爲正殿而以原

廟爲神寢宮此又爲一議若神意不准二議原欲

仍舊向

啓聖

亦惟神是聽不敢有違

啓聖

既經目

擊不敢吝惜敬陳三議分列三闔惟神裁定

記誌

師泉井記

施朗

今上御極之二十一載壬戌孟冬余以奉

命統率舟師徂征臺灣貔虎之校犀甲之士簡閱而

從者三萬有餘衆駐集平海之灣俟長風破巨浪

以靖掃蛟窟爰際天時暘亢泉流殫竭軍中取汲

之道遙遙難致而平故遷徙之壤介在海陬昔之

井廛盡成堙廢始得一井於天妃行宮之前距海

不盈數十武漬鹵浸潤厥味鹹苦原夫未達廣源

其流亦復易罄詢諸土人咸稱是井曩僅可供百

家之需至隆冬澤愆水涸用益不贍允若茲則三軍之士所藉以朝饔夕飧者果奚恃歟余乃殫摠誠懷祈禱神聰拜禱之餘不崇朝而泉流斯擴味轉甘和綆汲挹取之聲晝夜靡間歎涌滋漑畧不顯其虧盈之迹凡三萬之衆咸資飲沃而無呼癸之慮焉自非靈光幽贊佐佑戎師殲殄妖氛翼衛王室未有弘闡嘉祥湛澤汪濊若斯之渥者也因鐫石紀異名曰師泉昭神貺也在易地中有水曰師師之行於天下猶水之行於地中既著容民畜衆之義必協行險而順之德是知師以衆正乃克副

大君討貳撫順懷柔萬邦之命而揚旌海外發軔涯涘神異初彰闔惠覃布誕惟

聖天子赫濯之威以致百靈效順山海徵奇亶其然乎昔貳師劍刺大宛之山而流水溢出耿恭拜禱疏勒之境而飛泉奔湧并能拯軍士於渴乏著萬里之奇功乃今井養不窮三軍獲福余之不敏曷以答茲鴻嘉之賜哉是用勒之貞珉以誌不朽云

天后顯聖錄

○天妃誕降本傳

天妃莆林氏女也始祖唐林披公生子九俱賢當
憲宗時九人各授州刺史號九牧林氏曾祖保吉公
乃邵州刺史蘊公六世孫州牧圉公子也五代周
顯德中爲統軍兵馬使時劉崇自立爲北漢周世
宗命都檢點趙匡胤督戰於高平山保吉與有功
焉棄官而歸隱於莆之湄洲嶼子孚承襲世勲爲
福建總管孚子惟慤諱愿爲都巡官卽妃父也娶
王氏生男一名洪毅女六妃其第六乳也二人陰

行善樂施濟敬祀觀音大士父年四旬餘每念一
子單弱朝夕焚香祝天願得哲胤爲宗支慶歲已
未夏六月望日齋戒虔讚大士當空禱拜曰某夫
婦兢兢自持修德好施非敢有妄求惟冀上天鑒
茲至誠早錫佳兒以光宗祧是夜王氏夢大士告
之曰爾家世敦善行上帝式佑乃出丸藥示之云
服此當得慈濟之貺既寤歆歆然如有所感遂娠
二人私喜曰天必錫我賢嗣矣越次年宋太祖建
隆元年庚申三月二十三日方夕見一道紅光從
西北射室中晶輝奪目異香氤氲不散俄而王氏

腹震即誕妃於寢室里隣咸以爲異父母大失所
望然因其生奇甚愛之自始生至彌月不聞啼聲
因命名曰默幼而聰穎不類諸女甫八歲從塾師
訓讀悉解文義十歲餘喜淨几焚香誦經禮佛旦
暮未嘗少懈婉孌季女儼然窈窕儀型十三歲時
有老道士立通者往來其家妃樂捨之道士曰若
具佛性應得渡人正果乃授妃玄微秘法妃受之
悉悟諸要典十六歲窺井得符遂靈通變化驅邪
救世屢顯神異常駕雲飛渡大海衆號曰通賢靈
女越十二載道成白日飛昇昔宋雍熙四年丁亥

秋九月重九日也

窺井得符

妃少時與羣女閒遊照粧於井中忽見神人捧銅符一雙擁井而上有神侍仙官一班彷彿迎護狀諸女駭奔妃受之不疑少頃乘虛而化衆報父母及里隣視銅符果出神授莫不驚異自此符咒徑可辟邪法力日見玄通常身在室中神遊方外談吉凶禍福靡不奇中

機上救親

秋九月父與兄渡海北上時西風正急江上狂濤

震起妃方織忽於機上閉睫遊神顏色頓變手持梭足踏機軸狀若有所挾而惟恐失者母怪急呼之醒而梭墜泣曰阿父無恙兄沒矣頃而報至果然彼時父於怒濤中倉皇失措幾溺者屢隱似有柱其舵與其兄舟相近無何其兄之舵摧舟覆蓋妃當閉睫時足踏者父之舟手持者兄舵也

化草救商

嶼之西有山曰門夾當港口出入之衝砢礁錯雜有商舟渡此遭風舟衝礁浸水舟人號哀求救妃曰砢頭商舟將溺可急拯衆見風濤震盪不敢向

前妃乃擲草數根化成大杉排駕至前舟因大木
相附得不沉少頃風漸平浪漸息舟中人相慶皆
以爲天助及攔岸整理舟楫倏見大木飄流不知
方所詢鄉人方知化木附舟悉神姑再造力

菜甲天成

湄洲有小巖在旁流中一日妃遊至其地適母遣
人以菜子油遺之妃傾之地上遂抽芽解甲燦然
青黃布滿山塋不煩播種四時不絕自生自熟於
荒煙斷汊之間莖榦花葉可以薦神供佛名曰菜
子巖鄉人采之爲仙葩神卉至今猶野香郁郁

鹵之外洵爲勝槩

挂蓆泛槎

妃時欲渡江值舟中蓬槩不備舟子以風濤洶湧
不敢解纜妃曰無事此即草蓆代之令人懸於桅
端帆起舟駛恍若鳬鷖之浮沫白雲一葦入水不
濡碧海孤帆與波俱出追狂飈而鼓棹破巨浪而
旋槎觀者驚爲飛渡

鐵馬渡江

時漁民往北採捕海岸乏舟妃渡水無楫取簷前
所懸鐵馬鞭而策之跨江如奔電追風人見青驄

行水天馬騰空且怪且愕及登岸又不見解鞍嘶
秣尤爲驚異

禱雨濟民

妃年二十一歲時莆大旱山焦川涸農民告困通
郡父老咸曰非神姑莫解此厄縣尹詣妃求禱妃
往祈焉擬壬午申刻當雨及期日已午烈燄麗空
片雲不翳尹曰姑殆不足稱神乎未幾陰霾四起
甘澍飄灑平地水深三尺西成反獲有秋衆社賽
日咸懽呼頂禮稱神姑功德不可思議

降伏二神

先是西北方金水之精一聰而善聽號順風耳一
明而善視號千里眼二人以金水生天出沒西北
爲祟邨民苦之求治於妃妃乃雜跡於女流採摘
中十餘日方與之遇彼誤認爲民間女子將近前
妃叱之遽騰躍而去一道火光如車輪飛越不可
方物妃手中絲帕一拂霾障蔽空飛颺卷地彼仍
持鐵斧疾視妃曰敢擲若斧乎遂擲下不可復起
因咋舌伏法越兩載復出爲厲幻生變態乘濤騎
沫滾盪於浮沉蕩漾之中巫覡莫能治妃曰江河
湖海水德攸鍾彼乘旺相之鄉須本土方可克之

至次年五六月間絡繹問治於妃妃乃演起神咒
林木震號沙石飛揚二神躲閃無門遂拜伏願皈
正教時妃年二十三

龍王來朝

東海多神怪漁舟多溺妃曰此必怪物爲殃乃命
舟鼓棹至中流風日晴霽頃望見水族輳集錦鱗
彩甲跳躍煦沫遲遲濤頭擁一尊官類王子儀容
鞠躬嵩呼於前水潮洶湧舟人戰慄不已妃曰不
須憂傳示免迎突然水色澄清海不揚波始知龍
王來朝以後凡遇妃誕晨水族會洲前慶賀是日

漁者不敢施罟下釣

收伏晏公

時有負海怪物曰晏公每於水中趁江豚以噓風
鼓水妖以擊浪翻溺舟楫深爲水途大患妃遊至
東溟見一碧萬頃水天涵泓半晷間江心澎湃舟
子急呼曰桅舵搖撼矣妃令拋旋見一神掀髯突
睛金冠繡袖隨潮升降觸纜拂檣形如電掃雷震
妃色不動顯出靈變忽旋風翻浪逆湃倒澎彼伏
神威叩謝盪舟而還但一時爲法力所制終未心
服繼假逞色相變一神龍挾霧翼雲委蛇奔騰妃

曰此妖不除風波不息乃拋旋中流龍左翻右滾
機破技窮仍還本象唯見整然衣冠儼一尊人駐
旋不動妃命投下緯繩彼近前附攝不覺隨攝隨
粘牢固難解飄蕩浮於水上始懼而伏罪妃囑之
曰東溟阻險爾今統領水闕仙班護民危厄由是
永依法力爲部下總管

靈符回生

歲祲疫氛盛行莆縣尹闔家病篤吏告以湄嶼神
姑法力廣大能起死回生救災恤難尹齋戒親詣
請救妃曰此係天數何敢妄干尹哀懇曰千里宦

遊全家客寓生死懸於神姑幸憫而救之妃念其
素稱仁慈代爲懺悔取菖蒲九節並書符咒令貼
病者門首煎蒲飲之病者立瘥尹喜再生之賜舉
家造門拜謝自此神姑名徹寰宇矣

伏高里鬼

高里鄉突有陰怪含沙侵染百病村人共詣神姑
求治妃知爲山僻小木精作祟取符咒貼病者床
頭衆如命而行聞屋瓦響處一物如鳥拚飛而去
妃跡其所之掃穴除之比至遽幻作一小鳥匿樹
杪只見渺渺林端突起一團黑氣妃曰不可留此

爲桑梓憂追擒之唯一鷦鷯唧唧將符水一灑鳥
踏空而墜并無形體僅存一撮枯髮舉火焚之突
現本相兀兀一小鬼子叩拜曰願皈臺下服役收
之先是符咒未至之前一宵於民間忽語人曰我
將別當饗我主人具儀禮宴之次晨符咒至卽從
屋上出去蓋亦預知法力難逃也

奉旨鎖龍

姑二十六歲春正月霪雨至夏淋漓弗止閩浙盡
罹其災省官奏聞天子命所在祈禱莆人詣請神
姑妃曰上下多獲戾於帝故龍爲災亦數使然今

既奉天子命當除厥禍爲我邑造福見白虬奔躍
衝突又青黃二龍游盪於潯蒼之表妃焚靈符忽
有神龍面王冠荷戟而前曰奉帝罰此一方何可
逆命妃曰誠知王旨降災但生民遭困已極下界
天子爲民請命當奏上帝赦之遂鎖住白虬彼一
青一黃尚騰波翻覆妃乃焚香祭告遽有金甲神
人逐潮似追尋狀莆大霽秋且告稔有司特奏神
姑鎖龍神功奉旨致幣報謝浙省水災亦漸平

斷橋觀風

吉蓼城西有石橋跨海當周道往來之津一日忽

怪風掃地霹靂如雷橋柱盡折人病涉水相傳風伯爲災妃往觀焉遙望一道黑氣噴薄迷天知二亭爲祟因演出靈變俾其遠遁戒鄉人晦冥風雨毋犯之

收伏嘉應嘉祐

時有二魔爲祟一曰嘉應一曰嘉祐或於荒丘中攝魄迷魂或於巨浪中沉舟破艇妃至遂逃於雲天杳渺之外適客舟至中流風翻將沉見赤面金裝當前鼓躍妃立化一寶貨舟拍浮而遊嘉祐卽舍客舟乘潮而前妃以咒壓之擊刺落荒遂懼而

伏妃又從山路獨行嘉應不知爲民間美妹將犯之妃拂飛塵霾彼遂幻變騰掀終不越故處若有限距而無門突出者因悚然退避但魔心未淨歲餘復作蠱害妃曰此物不歸正道畢竟爲妖爲孽令人各焚香齋戒奉符咒自乘小艇象漁者遨遊烟波之中嘉應見之卽衝潮登舟坐於桅前不覺舟駛到岸妃佇立船頭遽悔罪請宥並收爲將列水闕仙班共有一十八位凡舟人值危厄時披髮虔請求救悉得其默佑

湄洲飛昇

本傳

宋太宗雍熙四年丁亥妃年二十八秋九月八日
妃語家人曰心好清淨塵寰所不樂居明辰乃重
陽日適有登高之願預告別期衆咸以爲登臨遠
眺不知其將仙也次晨焚香演經偕諸姊以行謂
之曰今日欲登山遠遊以暢素懷道阻且長諸姊
不得同行傷如之何諸人笑慰之曰遊則遊耳此
何足多慮妃遂徑上湄峯最高處但見濃雲橫岫
白氣亘天恍聞空中絲管聲韻叶宮徵直徹鈞天
之奏乘風翼靄油油然翱翔於蒼旻皎日間衆咸
歛歔驚嘆祇見星虹輝耀從雲端透出重霄遨遊

而上懸碧落以徘徊俯視人世若隱若現忽彩雲
布合不可復見嗣後屢呈靈異鄉之人或見諸山
巖水洞之旁或得之升降跌坐之際常示夢顯聖
降福於民里人畏之敬之相率立祠祀焉號曰通
賢靈女時僅落落數椽而祈禱報賽殆無虛日

顯夢闢地

湄嶼初建廟宇甚窄狹有長者之子善信居山之
西妃乃托之夢曰我廟宇卑隘爲我擴之當昌爾
後是夜夫婦協夢清晨造廟拜答願依神命迺闢
地購金增厥式廓廟貌一啟而維新焉

禱神起旋

季春有商三寶者滿裝異貨要通外國舟泊洲前
臨發旋膠弗起舟人入水見一怪坐旋不動急報
客大驚登岸詢洲人此方何神最靈或曰本山靈
女極稱顯應遂詣祠拜禱恍見神女優游旋上鬼
怪辟易其旋立起乃插香一瓣於祠前石間祝曰
神有靈此香爲證願顯示徵應俾水道安康大獲
貲利歸卽大立規模以答神功迨泛舟海上或遇
風濤危急拈香仰祝咸昭然護庇越三載回航全
安復造祠見前所插瓣香悉盤根萌芽化成三樹

正值三月廿三日神誕枝葉叢茂香氣郁郁繽紛
商人竒其感應捐金創建廟宇煥乎改觀及宋仁
宗天聖中神光屢現善信者復感靈異廣大其地
廊廡益增巍峩

枯楂顯聖

宋哲宗元祐元年丙寅莆海東有高墩去湄百里
許常有光氣夜現漁者疑爲異寶伺而視之乃水
漂一枯楂發焰漁人拾置諸家次晨視之楂已自
還故處再試復然當夕託夢於寧海墩鄉人曰我
湄洲神女其枯楂實所憑也宜祀我當錫爾福父

靈應

老異之告於制幹李公公曰此神所棲也吾聞湄有神姑顯跡久矣今靈光發見昭格必爲吾鄉一方福叨神之庇其在斯乎遂募衆營基建廟塑像崇祀號曰聖墩禱應如響李公乃捨魚桁二十四門於廟前供香燈又闢田地二百畝於本嶼供祭祀以答靈庥

聖槎示現

莆東寧海橋有一老叟偕衆人方渡時忽見光氣燭天縹渺層波中繼而漸近乃是古木其狀絕異乘流而下人莫能識是夜妃託夢鄉人始知爲當

年顯應神槎云

銅鑪溯流

宋哲宗元符初莆南六十里地名曰楓亭其溪達海係南北通津戊寅潮長時水漂一銅鑪寶色燁然溯流而至鄉人觀者如堵咸嘖嘖稱奇衆下水取而藏之是夕楓人同得夢云我湄神也欲爲爾一鄉造福相傳異其事爰備香花奉銅鑪至錦屏山下草構數椽祀焉凡禱祀者無不應驗里人林文可感神靈默祐割田與衆募建以廣之

朱衣著靈

宋徽宗宣和四年壬寅給事中允迪路公奉命使高麗道東海值大風震動八舟溺七獨公舟危蕩未覆急祝天庇護見一神女現桅竿朱衣端坐公叩頭求庇倉皇間風波驟息舟藉以安及自高麗歸語於衆保義郎李振素及墩人備述神妃顯應路公曰世間惟生我者恩罔極我等飄泊大江身瀕於死雖父母愛育至情莫或助之而神姑呼吸可通則此日實再生之賜也復命於朝奏神顯應奉旨賜順濟爲廟額蠲祭田稅立廟祀於江口

托夢建廟

宋紹興二十六年丙子以郊典特封爲靈惠夫人二十七年莆城東五里許有水市諸舶所集曰白湖歲之秋神來相宅於茲章氏邵氏二族人共夢神指立廟之地丞相俊卿陳公聞之驗其地果吉因以奉神歲戊寅廟成三十年流寇劉巨興等嘯聚直抵江口居民虔禱於廟忽狂風大震煙浪滔天晦冥不見神靈現出空中賊懼而退旣而復犯海口神又示靈威賊遂爲官軍所獲奏聞天子詔加封靈惠昭應夫人

聖泉救疫

宋孝宗乾道二年春郡大疫神降於白湖旁居民
李本家曰瘟氣流行我爲郡請命於帝去湖丈許
有甘泉飲此疾可瘳境內羅拜神賜但此地斥鹵
疑無清流以神命鑿之及深猶不見泉咸云此係
神賜勉加數鋤忽清泉沸出人競取飲之甘冷若
醴汲者絡繹於路至相爭攘朝飲夕瘥人皆騰躍
拜謝曰清泉活人何啻甘露真有回生之功乃甃
爲井號曰聖泉郡使者奏於朝詔封靈惠昭應崇
福夫人

溫台勦寇

宋孝宗淳熙十年癸卯福建都巡檢美特立奉命
征勦溫州台州二府草寇官舟旣集賊船蟻水面
衆甚懼方相持之際咸祝曰海谷神靈惟神女夫
人威靈顯赫乞垂庇護隱隱見神立雲端輶蓋輝
煌旗幡飛颺儼然閃電流虹賊大駭俄而我師乘
風騰流賊舟在右急撥棹衝擊之獲賊酋並擒其
黨餘鯨四散奔潰奏凱而歸列神陰相之功奏於
朝奉旨加封靈惠昭應崇福善利夫人

救旱進爵

宋光宗紹熙元年庚戌夏大旱萬姓號呼載道神

示夢於郡邑長曰旱魃爲虐我爲君爲民請命於天某日甲子當雨及期果銀竹紛飛金飈噴澍焦林起潤嘆谷生春郡邑交章條奏天子詔神福民殊勲應褒封進爵頒詔進封靈惠妃以彰聖靈

甌閩救潦

宋寧宗慶元四年戊午甌閩苦雨滂沱不止漂屋蕩崖春夏倉廩告匱民不聊生有司請蠲議賑莆人共禱於神夜夢神示之曰人多不道厥罰常陰故上天因此一方人今爾衆虔恭我爲爾奏於帝帝矜之越三日當大霽且錫有秋之貺至期果見

扶桑破曉暘谷春生早禾得水而榮西成大熟省官奏聞奉旨加封靈惠助順妃以報厥功

平大奚寇

戊午秋大奚寇作亂調發閩省舟師討之舳艫相接將士枕戈島寇巨艦銜尾而至銳不可當衆懼各請神香火以行與賊遇於中流彼居上風難以取勝衆禱於神曰願藉神力掃妖氛上慰天子討叛之心下救萬民蹂躪之苦頃刻間昏霧四塞返風旋波神光赫濯顯現遂衝突無前渠魁就擒餘寇或溺或潰掃蕩無遺凱奏具陳神陰佑大勲奉

旨詔神爲國家討賊其議加封號以答神庥

一家榮封

慶元六年朝廷以神妃護國庇民功叅立造人本
乎親慶自先貽於是頒詔封妃父爲

積慶侯又改封

威靈侯又以顯赫有裨民社加封爲

靈感嘉祐侯母王氏封

顯慶夫人兄封

靈應仙官神姊封爲

靈惠夫人佐神

紫金山助戰

宋寧宗開禧改元乙丑冬金人僕散揆從八疊灘
潛渡淮聚哨淮甸王師啓行北伐人心洶湧求庇
於神至直隸安豐戎馬戒嚴神示夢於將領畢再
遇等曰金人犯順北顧貽憂若等銳志克敵吾當
助威以佐天子初戰於花鬻鎮神現靈雲端衆望
空中若有萬馬馳騁狀知爲神力呵護賈勇向前
大炮碎其酋長賊遂却又會戰於紫金山賊甚猖
獗臨陣時復見旌旗閃空將領嚴令督戰兵士擁
楯而進敵乃披靡獲馬百餘匹斬馘數百人賊復

靈應

大聚合淝聞雲端鏘鏘有劍戟聲賊益懼且戰且退遂解合淝之圍全師返旆人唱饒歌天子聞神兵陰助有護國大功加封靈惠助順顯衛妃以答神庥

助擒周六四

嘉定改元戊辰秋草寇周六四哨聚犯境舟艦不可勝計時久旱後人窮無賴者多旣困赤地遂入綠林乘亂劫掠廬舍寥落闔邑哀禱於神神示之夢曰六四罪已貫盈特釜中遊魚耳當爲爾殲之越四日入境喊聲動地忽望空中有劍戟旗幟之

形各相驚疑退下舟遽衝礁擱淺尉司駕艇追之獲其首餘兇悉就俘寇平境內悉安奏上天子奉旨加封靈惠護國助順嘉應英烈妃

錢塘助隄

宋理宗嘉熙元年浙省錢塘潮翻江隄橫潰大爲都省患波湧浩蕩版築難施都人號祝於神妃忽望水波汹涌時濤頭上艮山祠若有所限拒而水勢倒流不前者因之水不衝溢隄障得成永無泛圯之患衆咸稱神力捍禦有司特奏於朝奉旨神功赫濯大有裨於朝家議加封號以答靈感

拯興泉饑

寶祐改元莆興泉大旱穀價騰湧飢困弗支老幼朝夕向祠前拜禱夢神夜告曰若無憂米艘卽至矣初廣地賈客擬裝米上浙越偶一夜神示夢曰興泉苦飢米貴速往可得利客寤而喜謂神示必獲利滋倍遂載入興入泉南艘輻輳民藉以不飢米價反平郡人頗矜天幸商人怏怏言神夢不驗詢其得夢之由方悟神爲二郡拯饑又思前夕米艘卽至之夢果屬不虛咸嘆再造神功焚香拜謝天子聞之詔褒封靈惠護國助順協正嘉應英烈

妃三年又以顯靈加封靈惠護國助順協正嘉應慈濟妃四年丙辰以浙江隄岸告成加封靈惠護國助順協正嘉應善慶妃

火焚陳長五

開慶改元歲在己未陳長五兄弟縱橫海上去來於興泉漳之間殺掠逞兇家無安堵三郡大困請命於神郡守徐公夢神示之曰當殄此賊以靖地方徐公素敬信神妃即率寨官石玉等勵兵備之朝廷督王憲使鎔尅期勦賊越八月賊三舟入湄島將屠掠蓼禧禱於神弗允解衣偃卧廊廡下悖

慢不敬俄有火焚其身肉綻皮爛痛楚哀呼賊大
懼退遁舟中神起順風誘之出港忽天日晦冥風
雨驟至及開霽賊三舟已在沙浦上膠淺不動憲
使王鎔曰此神授也逆賊當殲滅矣揮兵急擊賊
奔潰先擒長五郭敬叔等帥兵追至莆禧擒長六
長七乘潮退遁復追至福清并俘之磔於市脅從
者罔治徐公具陳神妃庇助之功憲使奏上天子
勅議典禮進封靈惠護國助順協正嘉應顯濟妃
兩司捐萬楮助修宮殿以報神貺

怒濤濟溺

天曆元年夏備海道萬戶府分司運糧至大海遭
颶風驟起巨浪連天七日夜不息人困力疲運艘
幾於翻覆舟人哀號仰禱神妃求佑會日暮有燈
從空而下掩映舟中輝耀如晝宛見神靈陟降少
頃怒濤頓平船上覺異香縝郁自此水道無虞徑
抵直沽都省奏聞奉旨差翰林國史院學士普顏
實理欽賫御香馳驛致祭二年漕運復藉神妃默
庇無失加封護國輔聖庇民顯祐廣濟靈感助順
福惠徽烈明著天妃遣官黃_份等馳傳具禮專詣
湄洲特祭並致祭淮浙閩海等處各神廟共祭一

十五所

神助漕運

至順元年庚午春糧船七百八十隻自太平江路太倉劉家港開洋遇大風突起波撼星辰桅檣飄蕩數千人戰慄哀號官吏懇禱於神妃言未已倏陰雲掩靄恍見空中有朱衣擁翠蓋佇立舟前旋有火照竿頭晶光如虹舟人且驚且喜無何風平浪息七百餘艘飄流四散重集令整理蓬槳解纜而進又聞空中有語云可向東南孤島暫泊衆即撐舟依孤島旁方拋旋江上狂飈迅發暴雨倒峽

舟人相慰曰非神靈指示我等皆在鼉宮蛟窟矣次日晴霽遂達直沽交卸中書奏神護相之功奉旨賜額曰靈慈

擁浪濟舟

洪武七年甲寅泉州衛指揮周坐領戰船哨捕忽遇颶風大作衝泊擱礁舟人環泣稽首呼神妃求庇黑夜間倏見神火懸空畢照桅檣皆現周喜曰吾聞海上危急時得神火照耀雖危亦安神其佑我乎俄而巨浪躍起將船盪浮從矜隙直踰磯北順流駛至岸邊時天欲曙差認港跡始得無恙歸

至泉立廟奉祀仍運木赴湄與修整宮殿其杉木未載者浮水面自飄流到湄木頭各有天妃二字衆皆竒之自是重建寢殿及香亭鼓樓山門復塑聖像製旗鼓沿途鼓吹送至祖廟時又有張指揮領兵出海默祝神妃保佑果得顯應由泉裝載木料來湄洲構一閣於正殿之左名曰朝天閣

藥救呂德

洪武十八年興化衛官呂德出海守鎮得病甚危篤求禱於神夢寐間見一神女儼然降臨命侍兒持丸藥輝瑩若晶珀示之曰服此當去二豎德接

而吞之遽寤香氣猶藹藹未散口渴甚取湯飲嘔出二塊物頓覺神氣爽豁宿疴皆除遂平復如常是夕夢神云疇昔之夜持藥而救爾者乃慈悲觀音菩薩示現也當敬奉大士呂德感神靈赫奕遂捐金創建觀音堂於湄嶼

廣州救太監鄭和

永樂元年欽差太監鄭和等往暹羅國至廣州大星洋遭風舟將覆舟工請禱於天妃和祝曰和奉命出使外邦忽遭風濤危險身固不足惜恐無以報天子且數百人之命懸於呼吸望神妃救之俄

聞喧然鼓吹聲一陣香風颯颯飄來宛見神妃立
於桅端自此風恬浪靜往返無虞歸朝復命奏上
奉旨遣官整理祖廟和自備寶鈔五百貫親到湄
嶼致祭

舊港戮寇

永樂三年欽差太監等官往西洋舟至舊港遇荏
苒截劫順流連艦而至勢甚危急衆望空羅拜懇
禱天妃忽見空中旌旗旆旆雲巔影耀滄溟突而
江流激浪幟轉帆翻賊艘逆潮不前官兵忽蕩進
上流乘潮揮戈逐之一擊而魁首就俘再擊而餘

孽遠潰自此往返平靜回京奏神功廣大奉旨着
福建守鎮官整蓋廟宇以答神庥

夢示陳指揮全勝

永樂七年欽差太監統領指揮陳慶等往西洋賊
規知垂涎寶貨率數十艘於中流截劫正值上風
奔流如飛我舟被困衆俱股栗陳慶曰奉君命到
此數百人在茫茫大海中須決雌雄尚可生還騎
虎之勢安可中下兵法謂置之死地而後生正在
今日衆曰不若拜禱天妃慶從之是宵陳慶夢神
語曰今夜風急可乘昏霧溯流而上翼日佐爾一

天戶縣志
帆風殲此醜類慶以告內使鼓棹向前比曉已居
上流賊逆風不得進我舟離賊已遠衆欲遠遁慶
復曰長江萬里西國迢遙回首不見家山彼狡爾
鯨鯢豈能忘情於我若飄泊偷安恐賊黨出沒煙
波終入其網今風信順便殆神授也急擊勿失遂
勵兵奔衝而下遠望神儼現空中閃爍如虹如電
賊駭愕風急舟騁賊蓬被官桅倒插破裂陳慶揮
刃越舟賊首投水鈎而俘之餘悉就擒獲貨物軍
器無算內使及陳指揮率衆叩謝神妃曰反敗爲
功轉禍爲福再造之德山高水深復命奏上奉旨

褒嘉委官重置廟中器皿親賁詣廟致祭

助戰破蠻

永樂十八年正月倭寇哨兵渡海欽差都指揮張
翥統領浙江定海衛水軍防禦距海相持日本慣
習水戰分舟師據海口我師樵汲道絕兵士困甚
同叩禱天妃拜請水仙忽波心撼激賊舟蕩漾浪
中撐東湧西我舟與賊船首尾相擊半晷間賊蓬
絳繩斷我舟中一兵披髮跳躍大呼曰速越舟破
賊翥發令曰此神所命先登者重賞遂奮勇衝殺
擒獲甚多其投水死者不計其數全收破蠻之功

事聞於上奉旨遣御史劉麟內官孔用唐貞詣廟致祭送長生鹿二對

東海護內使張源

永樂十九年欽差內使張源往榜葛刺國於鎮東海洋中官舟遭大風掀翻欲溺舟中喧泣源急叩天妃求佑言未畢忽見狂風旋舞中有赤旆飛揚衆疑其不祥須臾霰下風息浪平舟人踴躍懽忭皆曰頃赤旆飛揚實神靈返颶之力及自外國還特製袍幡詣廟拜謝本年太監王貴通等又奉命往西洋禱祝顯應奏上遣內官修整祖廟備禮致

祭

琉球救太監柴山

洪熙元年四月欽差內官柴山往琉球載神香火以行至外洋一夕雲霧晦冥山方假寐夢神撫其几曰若輩有水厄當慎之吾將爲汝解及寤不敢明言只嚴戒舵工加謹正揚帆而進突陰霾蔽天濤翻浪滾咫尺不相辨孤舟飄泊於洪波之中桅檣顛倒舟中墜水者數人舵工急取大板亂擲水中數人攀木而浮隨波上下呼天求救哀聲震天迨薄暮見燈光自天而來風倏靜浪倏平舵工亟

撥棹力救墮水者爭攀附登舟咸慶再生之賜回京奏上奉旨遣官致祭拜答神功

庇太監楊洪使諸番八國

宣德五年庚戌十二月欽差太監楊洪統領指揮千百戶及隨從人等駕船大小三十隻裝載彩幣賞賜阿丹暹羅爪哇滿刺加蘇門答刺木骨都東卜刺哇竹步八國虔恭奉祀神妃朝夕拜禱保佑一日舟至中流天日清霽遠望大嶼橫峙海中上多怪石錯生海物衆曰舟中沉鬱已久盍登岸少舒各奪磴而上又見旁有小磯一女子攜筐採螺

蜃競赴磯迫視之洪恐其肆慢趨前呵止女子忽不見回首大嶼已沒方知前所登嶼即巨鰲浮現其美女乃天妃現身救此數十人也各叩首謝歸奏上奉旨賫香致祭

託夢除奸

嘉靖中奸臣嚴嵩當權殘害忠義御史林公諱潤擬附本糾之夜間草藁未畢乃曰似此必無兩靜但含默非吾初志假寐几上夢神妃語之曰權奸蠹國公報主忠誠必俞所奏當不負厥梗直寤而嘆曰奸臣播虐忠良神人共憤天妃迺有除奸之

靈若此本得旨當廟祀血食春秋果章奏而帝俞
允遂建廟於涵江東卓地面以答英光

荏苒改革

天啓乙丑戊辰間荏苒草寇李魁奇出沒南溟結
夥入吉了抄掠復迤邐到賢良港港人擁神像江
頭示以神靈梓鄉冀免擾害神乃顯夢於酋長曰
而焚掠了城爲禍酷烈今尚欲困吾父母之邦若
不速退將殲爾類寇嘯聚弗去俄而狂飈躍浪蕩
散其舟大船沉溺餘者淪落波中自是悔罪乞宥
風且不靜願起蓋梳粧樓一座并塑聖像以謝過

乃得風靖遂移舟出港備牲醴香花到湄買置木
料裝運前來建造俯伏叩拜

本朝助順加封

康熙十九年二月十九日舟師征勦駐崇武與敵
對壘夜夢天妃告之曰吾佐一航北汎上風取捷
隨使其遠遁次日果得北風驟起敵遂披靡大敗
而退至二十六日舍廈門入臺灣內地海宇自是
清寧萬將軍大感神助立即具本奏神保佑之力
聖上甚慰陰功欽賜御香御帛差官賁詔到湄廟加
封致祭

湧泉給師

靖海將軍侯施於康熙二十一年十月奉命征勦
大師雲屯於平海此地斥鹵樵汲維艱只有神宮
前小井一口甚淺當炎天旱候尤易枯竭數萬軍
取給炊爨弗繼將軍侯乃祝諸神以大師札住願
藉神力俾源源可足軍需禱畢而清泉沸溢真不
異耿恭拜井之奇因是千萬軍取用不竭爰勒石
額之曰師泉并作師泉誌以著神庥

燈光引護舟人

將軍侯施於康熙二十一年十月舟次平海因謀

進取於十二月二十六夜開船一宵一日僅到烏
坵洋因無風不得行令駕回平海未到灣而大風
倏起浪湧滔天戰艦上小艇隨濤浮漾外洋天水
淼茫十無一存之勢次早風定差船尋覓及到湄
洲灣中見人船無恙且喜且駭曰似此風波安得
兩全答曰昨夜波浪中我意爲魚腹中物矣不意
昏暗之中恍恍見船頭有燈籠火光晶似人挽厥
纜而徑流至此衆曰此皆天妃默佑即棹回報上
將軍侯因於康熙二十二年正月初四早率各鎮
營將領赴湄致謝遍觀廟宇捐金山藻樣題遂吊

各匠估價買料重興梳粧樓朝天閣以顯靈惠

澎湖神助得捷

康熙二十二年六月內將軍侯奉 命征勦臺灣
洋洋大海澎湖係臺灣中道之衝荏苒竊踞出沒
要津難以徑渡侯於是整奮大師嚴飭號令士卒
舟中咸謂恍見神妃如在左右遂皆賈勇前進敵
大發火炮我舟中亦發大炮喊聲震天煙霧迷海
戰艦啣尾而進左衝右突凜凜神威震懾一戰而
殺傷彼衆并淹沒者不計其數其頭目尚踞別與
我舟放炮攻擊遂伏堵駛舟而遁澎湖自是肅清

先是未克澎湖之時署左營千總劉春夢天妃告
之曰二十一日必得澎湖七月可得臺灣果於二
十二日澎湖克捷其應如響又是日方進戰之頃
平海鄉人入天妃宮咸見天妃衣袍透濕其左右
二神將兩手起泡觀者如市及報是日澎湖得捷
方知此時即神靈陰中默助之功將軍侯因大感
神力默相奏請 敕封并議加封奉旨神妃已經
敕封即差禮部郎中雅虎等賞御香御帛到湄詣
廟致祭時將軍侯到湄陪祭見佛殿僧房尚未克
竣隨即捐金二百兩湊建

琉球陰護冊使

康熙二十二年欽差 冊封琉球賜蟒玉正一品
汪等官時在福建省於六月二十日諭祭天妃於怡
山院是時東風正猛不意行禮甫畢旗幟忽皆北
向遂解纜而行所有應歷水程悉若飛渡而下纔
三晝夜即到馬齒山遽至那霸港直達迎恩亭前
琉球之人皆謂從來封駕未有若此飛渡而來迄
夫典禮告竣開駕而回狂濤震撼巨浪滔天舟中
人皆顛覆煙竈等物盡委逝波茫無彼岸誠萬難
獲全之天使官肅將 簡命共籲神妃求佑返節

無恙當爲奏請春秋祀典永荷神庥虔禱方終神
應如響黑夜中漂泊衆見舟竿上有二燈籠光焰
在前時束桅鐵箍已斷十三桅應散而尚全繫篷
之頂繩斷不可續篷宜墮而猶懸桅拴裂踰尺桅
應倒而仍柱船不及壞因翌駛徑歸閩海港中使
官深叨神功復命奏請春秋祀典

朝廷即差官奉敕到湄致祭答謝

起蓋鐘鼓樓及山門

大總督姚奉 命征勦以海道艱虞風波險阻未
易報効中心懇摯極力圖維素信神靈赫濯禱應

如響懇祈陰光默佑協順破逆於康熙二十一年
差官到湄洲祖廟就神前致祝許願俾不負征勦
上命即重修宮殿答謝鴻庥迺於二十二年三月
二十三日天妃悅旦特委興化府正堂蘓 到湄
廟設醮致祭隨帶各匠估置木料擇吉起蓋鐘鼓
二樓及山門一座宮宇由是壯觀

大關宮殿

大總督姚 時議征勦雖不辭責重任大之艱而
踰塹越澮不無風波飄蕩之慮一片忠誠孚格惟
恃神靈默相以故天威震疊畏服人心於康熙二

十二年七月初旬臺灣果傾心向化舉島輸誠總
督捧頒 恩赦前至臺灣因少西北正風又恐逗
留詔命自福省放舟於八月二十三日親到湄洲
詣廟具疏神前虔祝順風願大關殿宇以報神功
於是神前拈闥准將東邊朝天閣改爲正殿舟尚
未開二十五夜見船上放光深感神明有赫即捐
金付興防廳張 仝同知林 昇估價置買木料西邊
朝天閣另爲起蓋遂擇吉建造正殿已經安基暨
樑緣興海防廳張丁艱謝事次歲完工
託夢護舟

隨征同知林昇同總兵官游澎奉委往撫臺灣於康熙二十二年九月初五日由湄洲放洋初六晚至臺灣十五日自彼開駕回十八夜夢天妃在船有四人戴紅帽從水仙門而上問其所來答曰舟船有厄將爲爾護十九早舟過砵砵與舟次擱淺舵折四尺將溺衆驚懼投拜神前懇求庇佑倏見天妃現身降靈保護乃得平穩十九晚收進八罩報復成功總督慰甚同知林昇到家虔誠答謝

助順冊封奏請兩祭編入祀典

康熙五十八年己亥 冊封琉球使臣海寶徐葆

光等於五月二十二日五虎門開洋風少偏東禱神立正因信琉球夥長用卯針太多船身落東北六百餘里應見釣魚黃尾等嶼皆不見二十七日神琰示得改用乙辰針又示初一日當到琉球二十八日始見葉壁山乃琉球北山也那霸港在南非西北風不能達禱之立轉子癸風一夜達那霸乃六月朔日也 五十九年庚子二月十六日自琉球放洋二十四日舟至鳳尾山雷雨並作旋風轉船蓬舵俱仄呼神始正二十八日舟夜泊七星山夾山下旋五更颶作旋走將觸礁呼神船如少

天恩顯聖錄
三
緩始得下旋人皆額手曰此天妃賜也海寶徐葆
光等於七月十一日至熱河復

命疏請春秋祀典禮部覆奏令該地方官春秋致
祭編入祀典八月初三日題初六日奉

旨依議欽遵在案

封舟採濟靈蹟

惟洪熙元年採濟柴山靈蹟詳顯聖錄以下
無考今斷自陳侃始

明朝

嘉靖十三年冊使陳給事侃

陳侃始有記故自侃始

高行人

澄舟至姑米山發漏呼禱得塞而濟歸值颶桅檣
俱折忽有紅光燭舟乃請筴起舵又有蝶雀示象
是夕風虐冠服禱請立碑風乃弛還朝奏請春秋
祀典

嘉靖四十年冊使郭汝霖李際春行至赤嶼無風

有大魚蕩舟乃施金光明佛并彩舟舁之遂得南風而濟及回閩日颶將發豫有二雀集舟之異須臾颶發失舵郭等爲文以告風乃息更置舵又有

一鳥集桅上不去萬曆七年冊使蕭給事崇業謝行人杰針路舛錯莫知所之且舵葉失去虔禱之次俄有一燕一蜻蜒飛繞船左右遂得易舵舟乃平安

萬曆三十年冊使夏給事子陽王行人士禎舟過花瓶嶼無風而浪禱於神得風順濟歸舟舵索四斷失舵者三大桅亦折水面忽現神燈異雀來集

東風助順

崇禎元年冊使杜給事三策楊行人掄歸舟颶作折舵牙數次勒索皆斷舟中三人共購一奇楠高三尺值千金捐刻聖像俄有奇鳥集檣端舟行若飛一夜抵閩云

本朝

康熙二年冊使張兵科學禮王行人垓歸船過姑米颶作暴雨船傾側危甚桅左右欹側龍骨半折忽有火光熒熒霹靂起風雨中截斷仆桅舵旋不止勒索皆斷禱神起舵三禱三應易繩下舵時有

一鳥綠背紅足若雁鴛集戰臺舟人曰天妃遣來
引導也遂達定海

康熙二十二年冊使汪檢討楫林舍人麟燭歸舟
颶風三晝夜舟上下傾仄水滿艙中合舟能起者
僅十六人廚竈漂没人盡餓凍虔禱天后許爲請
春秋祀典桅樞斷而桅不散頂繩斷而蓬不落與
波上下竟保無虞

康熙五十八年冊使海檢討

寶

徐編修

葆光

封舟

開洋風少偏東禱立正多用卯針船身太下幾至
落際遂虔禱得改用乙辰針又筭許二十八日見

山果見葉壁船下六百餘里欲收那霸非西北風
不能達禱之立轉一夜抵港 舟回至鳳尾山旋
風轉船篷柁俱仄呼神始正至七星山夾山下旋
五更颶作走旋將抵礁呼神船如少緩始得下旋
人皆額手曰此皆天后賜也

者 以上七條係照中山傳信錄全鈔故有複見

沐

以上小節命題中山書院生徐嘉驥
人習禮孝曰孔聖天也細思
可與致其未始能外於心
風雨飄搖外遊人初時憂
卒歸其終之立歸一外旅
山東其家也年六
百餘里

B4L

